

आकाशवाणी

खबरां

1. प्रधानमंत्री नरेन्द्र मोदी होरें आखेआ ऐ जे कृषि, भारती अर्थबवस्था दी रीढ़ ऐ ते लम्मी अवधि आहली विकास जात्तरा दा महत्वपूर्ण थम्म ऐ। मोदी होर बजट दे बाद आहले वेबिनार गी वीडियो कॉफ्रेंस दे राहें संबोधित करा'रदे हे।
2. प्रवर्तन निदेशालय - ईडी ने उद्योगपति अनिल अंबानी ते रिलायंस पावर कन्नै जुडी दिएं कंपनियें च कथित माली अनियमितताएं दी जांच दे सिलसिले च अज्ज मुंबई ते हैदराबाद च केई थाहें पर छापे मारे ना।
3. पच्छिम एशिया च जारी संघर्ष दे मद्देनजर, इंडिगो एयरलाइन ने पच्छिम एशिया ते इस्तांबुल थमां औने-जाने आहली डुआरिएं दी टिकट रद्द करने पर मिलने आहली पूरी छूट 31 मार्च तगर बधाने दा ऐलान कीता ऐ।
4. नेपाल च नमीं सरकार दे गठन लेई होए दे चुनाएं तैह्त वोटें दी गिनतरी चला करदी ऐ।
5. ऑल इंग्लैंड ओपन बैडमिंटन चैंपियनशिप च अज्ज अखीरले-8 दे मुकाबले च लक्ष्य सेन दा सामना चीन दे ली शी फेंग कन्नै होगा।

<><><><><><>

PM Natural Farming

प्रधानमंत्री नरेन्द्र मोदी होरें आखेआ ऐ जे कृषि, भारती अर्थबवस्था दी रीढ़ ऐ ते लम्मी अवधि आहली विकास जात्तरा दा महत्वपूर्ण थम्म ऐ। कृषि ते ग्रामीण परिवर्तन विशे पर बजट दे बाद आहले वेबिनार गी वीडियो कॉफ्रेंस दे राहें संबोधित करदे होई श्री मोदी होरें आखेआ जे सरकार ने कृषि खेत्तर गी मजबूत करने लेई नियमित रूप कन्नै केई गैहीं पुट्टियां ना। उ'नें आखेआ जे इस ब'रे दे केंद्री बजट च कृषि ते ग्रामीण बदलाव गी मजबूती दिती गेई ऐ। श्री मोदी होरें आखेआ ऐ जे भारत च फिलहाल अन्न-दाने, दालीं ते तिलें दी रिकॉर्ड पैदावार होआ करदी ऐ। प्रधानमंत्री मोदी होरें रसैनें शा मुक्त खेती ते कुदरती खेती गी मजबूत करने दे कन्नै निर्यात पर चेचा ध्यान देने पर जोर दिता। उ'नें आखेआ जे केंद्री बजट 2026-27 च उच्चे मुल्ल आहले कृषि उत्पाद पर बी चेचा ध्यान दिता गेआ ऐ। श्री मोदी होरें आखेआ ऐ जे तकरीबन 10 करोड़ करसानें गी पीएम किसान सम्मान निधि योजना दे तैह्त 4 लख करोड़ रुपें शा मते दी रकम हासल होई ऐ। उ'नें आखेआ ऐ जे प्रधानमंत्री फसल बीमा योजना दे तैह्त तकरीबन 2 लख करोड़ रुपें शा मते दे दावें दा नबेड़ा कीता जाई चुके दा ऐ। श्री मोदी होरें आखेआ जे सरकार ने तकरीबन 9 करोड़ करसान पन्ध्यान पत्तरें गी डिजिटल कीता ऐ। प्रधानमंत्री मोदी होरें आखेआ जे सरकार कृषि च तकनीकें बक्खी चेचा ध्यान देआ करदी ऐ। उ'नें आखेआ जे अज्ज ई-नाम दे माध्यम कन्ने बजार धोहड़ी सबनें दी पुज्जी होई गेदी ऐ। श्री मोदी होरें आखेआ जे प्रधानमंत्री आवास योजना, स्वामित्व योजना, पीएम ग्रामीण सड़क योजना ते आप सहायता समूहें गी माली मदाद ज्नेह जतनें कन्नै ग्रामीण अर्थबवस्था मजबूत होई ऐ। उ'नें आखेआ जे सरकार ने 3 करोड़ लखपति दीदी तैयार करने दा लक्ष्य कामयाबी कन्नै हासल करी लैता ऐ ते 2029 तगर 3 करोड़ होर लखपति दीदी तैयार करने दा लक्ष्य रक्खेआ गेआ ऐ।

<><><><><><>

Ed Anil Ambani

प्रवर्तन निदेशालय - ईडी ने उद्योगपति अनिल अंबानी ते रिलायंस पावर कन्नै जुडी दिएं कंपनियें च कथित माली अनियमितताएं दी जांच दे सिलसिले च अज्ज मुंबई ते हैदराबाद च केई थाहें पर तपाशी अभियान चलाया। अधिकारियें मूजब, ईडी दी तकरीबन 15 टीमें अज्ज बडुलै मुंबई च मुख तौर पर 10 शा 12 थाहें पर छापेमारी कीती। सूत्रें दस्सेआ ऐ जे रिलायंस पावर ते अंबानी कन्नै जुडी दिएं होरनें कंपनियें कन्नै सरबंधत लोकें ते संस्थाएं दे खलाफ तपाशी अभियान चलाया गेआ ऐ। एहदे शा पैहले, केंद्री जांच ब्यूरो ने रिलायंस कम्युनिकेशंस दे खलाफ 2 ज्हार 200 करोड़ रुपें शा मते दा बैंकिंग धोखाधड़ी दा मामला दर्ज कीता हा।

<><><><><><>

## VP-Nagaland

उपराष्ट्रपति सी.पी. राधाकृष्णन होरें नागालैंड दे युवाएं गी राष्ट्रीय सेवा च शामिल होने ते राष्ट्र निर्माण च जोगदान देने दा आह्वान कीता ऐ। उ'नें आखेआ ऐ जे विकसित नागालैंड, विकसित भारत च महत्वपूर्ण भूमिका निभाग। अज्ज जुन्हेबोतो जिले दे लुमामी च नागालैंड युनिवर्सिटी दे दीक्षांत समारोह च उपराष्ट्रपति होरें आखेआ जे भारत दी बड़ी मती बन्न-सबन्नता दे बावजूद, एकता ओहदी सबनें शा बड़ी ताकत ऐ। उपराष्ट्रपति होरें प्रधानमंत्री नरेन्द्र मोदी हुं'दे नेतृत्व च पिच्छले इक दहाके च पूर्वोत्तर खेत्तर च होए दे बड़े मते ढांचागत विकास ते शांति सरबंधी पैहलकदमिं दा जिक्क कीता। बन्ने आहले नागालैंड प्रादेशिक प्राधिकरण समझौते दा जिक्क करदे होई उ'नें आखेआ जे राज्य दे पूरे-पराते विकास लेई शांति ते सैह्योग अत्त लाजमी ना। उपराष्ट्रपति पूर्वोत्तर राज्यें नागालैंड, मिजोरम ते त्रिपुरा दे त्र'उं दिनें दे दौरै पर न ते कल आइजोल लेई रवाना होइना।

<><><><><><>

## IndiGo Free Waivers

पच्छिम एशिया च जारी संघर्ष दे मद्देनजर, इंडिगो एयरलाइन ने पच्छिम एशिया ते इस्तांबुल थमां औने-जाने आहली डुआरिं दी टिकट रद्द करने पर मिलने आहली पूरी छूट 31 मार्च तगर बधाने दा ऐलान कीता ऐ। इंडिगो ने दस्सेआ ऐ जे एयरलाइन ने जात्तरिं गी सलाह दिती ऐ कि जेगर उ'दी जात्तरा तय ऐ तां ओह डुआरी दी स्थिति दे बारे च ताजा जानकारी हासल करदे रौहना। कन्नै गै, बादू सहायता जां फही कुसै स्पष्टीकरण लेई जात्तरी, गाहक संपर्क केंद्र दे नम्बर \$91 124 617 3838 पर कॉल करी सकदे ना।

<><><><><><>

## West Asia Conflict

इजराईल ते अमरीका दिं सांझी फौजें ते ईरान बश्कार जारी संघर्ष दा अज्ज 7मां दिन ऐ। इस्राएल ने ईरान ते लेबनान दी राजधानियें पर बम्बबारी कीती। उत्थे गै अमरीका ने कथित तौर पर समुंदरै च इक ईरानी ड्रोन वाहक उप्पर हमला कीता। एह्दे'नै ईरान दे युद्धपोतें दे बेडे गी नशाना बनाने दा अमरीकी अभियान तेज होई गेआ। इजराईली फौजै ईरान दे मते सारी ब्हाई रक्षा प्रणालियें ते मिसाइल लॉन्चरें गी तबाह करने दा दावा बन्नेआ ऐ। उत्थे गै अमरीका दे रक्षा सचिव पीट हेगसेथ होरें खबरदार कीता ऐ जे तेहरान पर हमले बधने आहले न ते ईरानी सरकारी टेलीविजन ने इक नमें मिसाइल हमले दा ऐलान कीता ऐ जेह्दे च बड़ी खोरमशहर-4 मिसाइलें दा हमला शामिल ऐ। ईरान दे इस्लामिक रिवोल्यूशनरी गार्ड कोर ने आखेआ ऐ जे ओह्दे बलें ऑपरेशन टू प्रॉमिस दी 21मीं कडी शुरू कीती ऐ जेह्दे च इस्राएल गी नशाना बनाने आस्तै आत्मघाती ड्रोनें दे झुंड ते क्लस्टर वारहेड आहली उन्नत खैबर मिसाइलें दा इस्तेमाल कीता गेआ ऐ। लेबनान दे प्रधानमंत्री नवाफ सलाम होरें इस्राएल-हिजबुल्लाह जंग दे दरम्यान लेबनान दी मदाद लेई आलमी बिरदारी गी अपील कीती ऐ। संयुक्त राष्ट्र दे मनुक्खी अधिकारें सरबंधी हाई कमिशनर वोल्कर तुर्क होरें आखेआ ऐ जे दुनिया गी इस जंग गी नियंत्रित करने आस्तै फौरी गैहीं पट्टने दी लोड ऐ। कतर दे वायु रक्षा बलें अज्ज दोहा च स्थित अमरीका दे सबनें शा बड़े फौजी अड्डे अल-उदैद एयरबेस गी नशाना बनाइयै कीते गेदे ड्रोन हमले गी नाकाम बनाई दिता। इस्राएली वायु सेना ने अज्ज लेबनान च हिजबुल्लाह दे बेरूत आहले सदर दफ्तर ते फौजी ढांचे आहली इमारतें पर हमला कीता। अज्ज बडुलै इस्राएल ने घोषणा कीती जे उ'नें बेरूत च हिजबुल्लाह कमांडर जैद अली जुमा गी ते त्रिपोली च हमास कमांडर वसीम अत्तल्लाह अली गी मारी मुकाया ऐ। तोआई अमरीकी राष्ट्रपति डोनाल्ड ट्रम्प होरें ईरानी सेना गी आखेआ ऐ जे ओह थेहार सुट्टी देऐ। अमरीकी कमांडर ब्रैंड कूपर होरें आखेआ ऐ जे अमेरिक ने पिच्छले 72 घैंटें च ईरान दे अंदर तकरीबन 200 ठिकानों पर हमले कीते ना। हालांकि, ईरान दे बदेश मंत्री सैयद अब्बास अराघची होरें आखेआ ऐ जे मजूदा हालात लेई अमरीका पूरी चाल्ली कसूरवार ऐ।

<><><><><><>

## DM Self Feliance

रक्षा मंत्री राजनाथ सिंह होरेंआखेआ ऐ जे यक्कोतक्की दे इस जुग च प्रासंगिक बने दे रौहने दा इक्क-मात्तर रस्ता आत्मनिर्भरता ऐ। श्री सिंह होरें पच्छिम बंगाल दे कोलकाता च आयोजित रक्षा ते समुंदरी संवाद 'सागर संकल्प - भारत दी समुंदरी शान दी वापसी' दा उद्घाटन करने दे बाद एह गल्ल आखी। उ'नें गलाया जे आलमी सतह उप्पर

बने दे मजूदा हालात दे चलदे आपूर्ति श्रृंखलाएं दा नमें सिरेया गठन होआ ऐ। कन्नै गै, समुंदरी गतिविधियें च लगातार बाद्दा बी होआ ऐ। रक्षा मंत्री होरें दस्सेआ जे सरकार दे जतनें दे सकारात्मक नतीजे सामने आवा करदे ना। बरें 2024-25 च घरेलू रक्षा उत्पादन ने 1 लक्ख 50 ज्हार करोड़ रुपें दा रिकॉर्ड आंकड़ा पार करी लैता ऐ। उंनें आखेआ जे रक्षा निर्यात बी 24 ज्हार करोड़ रुपें दे अजें धोड़ी दे सबनें शा उच्चे स्तरें पर पुज्जी गोआ ऐ।

<><><><><><>

### Amit Shah Odisha

गृह मंत्री अमित शाह होरें आखेआ ऐ जे केंद्रीय औद्योगिक सुरक्षा बल यानि सीआईएसएफ दे बगैर भारत दा औद्योगिक विकास नामुमकन ऐ। ओडिशा च कटक दे मुंडुली च सीआईएसएफ दे 57में स्थापना दिवस समारोह गी संबोधित करदे होई श्री शाह होरें आखेआ जे एह बल देश भरै च प्रमुख औद्योगिक इदारें दी सुरक्षा जकीनी बनाने च महत्वपूर्ण भूमिका निभा करदा ऐ। उंनें आखेआ जे महत्वपूर्ण समुंदरी ईकाइयें दी सुरक्षा गी होर मजबूत करने आस्तै तौले गै बंदरगाह सुरक्षा दी जिम्मेदारी सीआईएसएफ गी सौंपी जाह्ग। माओवाद दे खलाफ लड़ाई दा जिक्र करदे होई गृह मंत्री होरें विश्वास व्यक्त कीता जे भारत मार्च 2026 तगर नक्सलवाद थमां मुक्त होई जाह्ग। उंनें आखेआ जे इस मिशन च सीआईएसएफ दा महत्वपूर्ण जोगदान दिता ऐ। इस मौके पर श्री शाह होरें ओडिशा दे म्हान सुतेंतरता सेनानियें गी बी श्रद्धांजलि अर्पित कीती।

<><><><><><>

### Gadkari-Biogas

सिडक ट्रांसपोर्ट ते जरनैली सिडकें सरबंधी केन्द्री मंत्री नितिन गडकरी होरें आखेआ ऐ जे भारत दी ईंधन दे आयात उप्पर निर्भरता घट्ट करने ते देशै गी ऊर्जा दे मामले च आत्मनिर्भर बनाने लेई बायोगैस सबनें शा बधिया विकल्प ऐ। उंनें एह गल्ल पुणे दी यशवंतराव चव्हाण विकास प्रशासन अकैडमी च आयोजित कम्प्रेस्ड बायोगैस सम्मेलन 2026 दे उद्घाटन दे मौके पर आखी। गडकरी होरें आखेआ जे भारत दा सलाना ईंधन आयात बिल 16 लक्ख करोड़ रुपें शा मता ऐ। उंनें आखेआ जे इस निर्भरता गी घट्ट करने लेई कम्प्रेस्ड बायोगैस जेह स्वदेशी ते किफायती ईंधन दी लोड़ ऐ। गडकरी होरें दस्सेआ जे कृषि अवशेषें, खास तौर उप्पर दिल्ली ते उत्तर भारत च फसल दे अवशेषें गी बायोगैस च तब्दील करने कन्नै पराली फुक्कने करी होने आहले प्रदूषण कन्नै निब्बडने च मदाद मिली सकदी ऐ।

<><><><><><>

### Nepal Election

नेपाल च नमीं सरकार दे गठन लेई होए दे चुनाएं तैहत वोटें दी गिनतरी चला करदी ऐ। झापा-5 थमां चुनांS लड़ा करदे नेपाल दे प्रधानमंत्री दे औहद्वे दे मेदवार बालेंद्र शाह 11 ज्हार 945 वाटें कन्नै अगगे चला करदे न जिसलै के उंदे प्रतिद्वंद्वी ते साबका प्रधानमंत्री केपी शर्मा ओली होरें गी हुनै धोड़ी 2 ज्हार 692 वोट मिले ना। काठमांडू-1 ते 2 दे नतीजे सामने आए न जित्थे आरएसपी थमां रंजू नेउपाने ते शिशिर काहनाल ने जित्त हासल कीती ऐ, जिसलै के मुस्तांग-1 थमां नेपाली कांग्रेस दे योगेश गौचन थकाली जेतू रेह ना। 165 सीटें दे खीरी नतीजे अज्ज रातीं धोड़ी सार्वजनिक होने दी मेद ऐ।

<><><><><><>

### MoS EAM Maritime Growth

बदेश राज्य मंत्री कीर्ति वर्धन सिंह होरें आखेआ ऐ जे विकासशील ते घट्ट विकसित देशें लेई समुंदरी विकास च स्थिरता बड़ी जरूरी ऐ। नमीं दिल्ली च रायसीना डॉयलाग दे दुए दिन श्री कीर्ति वर्धन सिंह होरें आखेआ जे भारत दे फैसले, राश्ट्र-हितें दे मूजब होंदे न ते कुसै इक गुट दे कन्नै जुडे दे नेई हैन। उंनें आखेआ जे भारत हिन्द-प्रशांत खेत्तर च मजूदा स्थिति गी बदलने दे इकतरफा जतनें दा बरोध करदा ऐ। उंनें आखेआ जे भामें यूक्रेन होऐ जां पच्छिम एशिया, भारत संवाद ते कूटनीति पर लगातार जोर दिंदा आया ऐ। कन्नै गै कनेक्टिविटी ते स्थिरता गी बढावा देने आस्तै भारत-पच्छिम एशिया-यूरोप आर्थिक गलियारें जेह जतनें गी अगगे बधा करदा ऐ।

<><><><><><>

## Goyal Higher Education

उद्योग ते बपार मंत्री पीयूष गोयल होरें देशै दी उच्च शिक्षा प्रणाली गी वैश्विक मानकें मूजब ढालने ते मते शा मते अंतरराष्ट्री विद्यार्थियों गी आकर्षित करने दा आह्वान कीता ऐ। नमीं दिल्ली च कुलपति सम्मेलन गी संबोधित करदे होई उ'नें युनिवर्सिटिएं गी आखेआ जे ओह पाठ्यक्रम गी आधुनिक बनाने दे कन्नो-कन्नो आर्टिफिशियल इंटेलिजेंस, क्वांटम कंप्यूटिंग ते मशीन लर्निंग जेही उभरदी तकनीकें गी बी अपनान। राश्ट्री शिक्षा नीति 2020 दा जिक्र करदे होई श्री गोयल होरें आखेआ जे एह नीति देश ते बदेश थमां हासल तकरीबन 3 लकख सुझाएं दी बिनाह उप्पर व्यापक विचार-बटांदरे दे बाद तैयार कीती गई। उ'नें आखेआ जे इस नीति ने शिक्षा च अंतरराष्ट्री मानकें दी बत्त खोली दिता ऐ।

<><><><><><>

## Badminton

ऑल इंग्लैंड ओपन बैडमिंटन चैंपियनशिप च अज्ज अखीरले-8 दे मुकाबले च लक्ष्य सेन दा सामना चीन दे ली शी फेंग कन्नै होग। लक्ष्य ने कल बर्मिंघम च मर्दे दे सिंगल्स क्वार्टर फाइनल च प्रवेश कीता हा। दुनिया दे 12 नंबर दे खड्डारी लक्ष्य ने प्री-क्वार्टर फाइनल च हांगकांग दे एनजी एंगस गी 21-19, 21-23, ते 21-10 कन्नै हराया। चैंपियनशिप च मिक्सड डबल्स जोड़ी ध्रुव कपिला ते तनीशा क्रास्टो दे हांगकांग दे तांग चुन मान ते त्से यिंग सुएट दे खलाफ 19-21 ते 8-9 कन्नै पिछड़ने दे बाद लक्ष्य गै इक्कले भारती खड्डारी बचे दे न।

<><><><><><>

## ICC

अंतरराष्ट्रीय क्रिकेट काउंसल- आईसीसी ने अज्ज मर्दे दे टी20 क्रिकेट विश्व कप च सबनें शा बेहतरिन खड्डारी दे पुरस्कार लेई नामज़द खड्डारिएं दी सूची दा ऐलान कीता ऐ। इस सूची च शामिल होने आहले संजू सैमसन इक्कले भारती क्रिकेटर न। भारती विकेटकीपर-बल्लेबाज ने नाँकआउट चरण च लगातार द'उं मैचें च जित्त दोआने आहले प्रदर्शन कीते न। उ'नें वेस्टइंडीज दे खलाफ सुपर-8 मुकाबले च नाबाद 97 रन्ज बनाए ते सेमीफाइनल च इंग्लैंड दे खलाफ 89 रन्जें की तेज पारी खेड्डी। उ'नें दौनें गै मुकाबलें च सबनें शा बेहतरिन खड्डारी दा ईनाम जित्तेआ।

<><><><><><>